

第七冊

卷十三

官政書

卷十四

列傳一

曲江縣志

曲江縣志卷十三

官政書

漢

區祉字景賢零陵東安人熹平中爲曲江長以太
守周昕循良遵承典憲宣揚德訓率履不越乃與
邑之故吏龔臺等立神漢桂陽守功勲銘曲江郭
蒼爲文立碑瀧上祀名宦

熊喬興平元年補桂陽曲江長爲政果達視事六
載鎮南將軍荊州牧劉表以爲民所安命還拜綏
民校尉領曲江長復蒞五年政隆上古流移歸懷
襁負而至吏民作誦遭母憂去官祀名宦

宋

鄒非熊字宗望宜黃人登淳熙中進士授樂昌尉
獲強盜恥受賞修復石渠以溉田民有去思辟曲
江令平反獄事活死囚十有二邑人刻石民有張
九韶者被盜獲執平民煅煉誣服非熊力爭破械
遣之居亡何真盜敗九韶失物咸在人服其明遷
判韶州陞辭陳三事上嘉納之官至廣東提刑自
號行岩持論勁爲文典人甚服之祀名宦

蕭鱗字耕道開禧乙丑進士授曲江簿以能遷知
仁化縣

明

吉昌北庭人元忠臣吉星之子少以孝行著聞舉
於有司洪武初令曲江才守兼優有政聲徵拜尚
寶司丞擢監察御史出爲山東按察司副使祀名
宦

保睿南通州人由歲貢知曲江縣鋤奸恤苦清介
自持嘗題詩後堂曰不似神仙會煉丹無緣措置
惠貪殘毫釐百姓心頭肉爲汝抽刀總是難去任
民爲垂涕祀名宦

姜寬蘇州人以貢士知曲江慈祥愷惻深得民心
郵客有厚望於寬者寬曰吾不能以民之脂膏充
若輩囊橐卒無所應於是度嶺者相與譖於當道

被遣積忿而卒百姓傷之祀名宦

金孚兌字吉所太平人萬厯辛卯舉人授曲江知縣值歲祲請於巡撫奏蠲稅糧復發官帑賑之所活數千家韶郡密邇諸洞互市交關者稍忤其意輒羣譁殺掠孚兌內嚴守禦外布恩信徭人戒不犯境爲粵東清廉第一民爲立德政碑於風度街潘復敏新昌人饒文采長于幹畧知曲江縣視事未久卽修城積粟時爲戰守計衆或迂之崇正十一年楚寇自樂昌徑薄韶州復敏以報政公出聞警兼程馳還竭力捍禦却賊全韶城人服其先見在任重修城隍廟纂輯縣志百廢具舉時稱能吏

陳雲龍全州人舉於鄉教諭曲江以振作斯文爲
已任建奎閣拓黌宮諸生中有不給者捐捧助之
未幾卒士林悼之

國朝

譚志武進人由邳州學正遷曲江令愛民好土工
書法尤精詩賦古文詞退食之餘惟事揮毫澹於
宦情蒞任數月卽拂衣歸有陶淵明之風臨行士
民有攀車流涕者著有令粵詩集

秦熙祚聞喜人康熙十九年以舉人知曲江縣冰
潔自矢不飾騶從邑遭兵燹後民多逃亡熙祚盡
心招徠哀鴻始集禁葦雜派嚴束胥吏拊循五載

清介如一日纂修邑志多所發明

苟金徽合州人康熙甲子舉人性孝友潛心理學
三十七年宰曲江愛民如子合邑感戴尤培養士
林捐增田租爲書院延師養士費至今賴之邑人
立祠尸祝

李憬陝西臨潼人進士嘉慶二十三年知曲江縣
勤以治事儉以養廉催科不擾民樂輸將聽訟旬
日而決民無廢時無失業票差不許逗留苛索違
者置之法胥役不能爲奸民有被命盜案誣陷者
立辨其冤民稱之曰李青天

陳遇隆籍未詳道光七年十年兩任曲江縣平易

謙恭政務簡要汰奸胥察蠹役閭閻交頌尤喜振興科名爲倡建東郊塔以新文運

侯金楷江蘇蕭縣人舉人以嚴明爲政有威名道光十三年知曲江縣敦教化正風俗肩輿馳道見異言異服者立詰之宵小畏懼刦盜竊發弋擒其首盜風寢息訊讞明決清操自矢嘗當食友以賄言遽起怒於色曰不意清夜飲冰尙來此不入耳之談也謝絕爲之廢食著吾所好錄一卷教民孝弟力田民風以厚在官法立令行循聲懋著解任以詩六章留別士民云圖民剩有催科拙萬戶耕桑不捕蛇慈愛之忱惓惓不釋邑人遮道餞祝

劉漢章字倬夫四川舉人道光二十年知曲江縣蒞治寬和民安其業下車觀風優獎士子遇大比年行賓興禮捐廉給資斧考校書院必擬程文與諸生相切琢縣治泮宮湫隘偕薦紳恢廓之大其閑閑朞月而竣振興文教培育人才邑人德之

陳應聘字覺民山東濰縣人進士道光二十八年知曲江縣下車觀風宏獎多士爲政勤慎民有訟者剖毫析芒無疑牘邑稱良吏在任五年調新會以守城功保升咸豐六年知韶州府七年兼護南韶連道連年竄匪告警均能竭力防守保衛間閭五福字嚮亭正白旗人性剛勁疾惡如仇咸豐三

年郡東江漲冲塌東門城根福以縣尉奉檄勘修
併日經營克期告竣上官察其能四年春檄知曲
江縣值匪聚仁化江爲害會營擒緝之匪解散四
月龍歸賭匪在白土水口設廠收規親往平之焚
其廠匪散游弋於烏石樟樹潭等處乃示民舉行
團練以自衛七月紅匪陳矮子梁二合英清股匪
十餘萬圍攻郡城遂募楚勇集街團登陴分守時
有匪溷迹守陴福巡視察其色慌恟詰之不能語
立帶回署令役解其衣內裹紅巾鞫之供裏應夥
黨設法擒其首梟之由是賊謀盡洩防守益固八
月匪敗去慮其復來札大塘矮寨西水各鄉集團

爲聲勢十月匪再迫圍城團勇迭次來援糧道賴以接濟至次年五月圍乃解招撫鄉民詰奸刑暴遇散勇滋擾立即提究訊賊務確無冤獄事平興農勸學以培元氣郡屬相江書院燬於賊籌款新之德政風行爲粵治行最旋以守城功保陞縣令歷知陽山番禺擢守雷肇二府

莫松齡連州人歲貢康熙五年教諭曲江剛直無私董率不懈諸生皆相慶爲得師云

何嘉元三水人順治甲午舉人教諭曲江樸茂真誠以身立教與諸生講學外雅喜吟詠著有映雪

軒集梓行

梁炯字蔗坡靈山人少登賢書博涉經史道光三年教諭曲江郡守重其誼聘掌教相江書院按日編課程朔望進諸生於齋次叩所學加勵之輯刻張余二公詩稿倡建劉希仁祠厯任五年以卓異擢知縣

李鳳章靈山人歲貢康熙二十年訓導曲江謙讓醇謹課士以勤學篤行不事浮飾邑人咸宗其師範

凌斐然大興人道光十一年由供事選授平圃分司息訟弭盜以司屬利病爲己任捐廉倡修柳洲坡圳灌漑糧田數千畝苦竹春坑兩處險道數十

里行人憚之乃於道旁設厰揭示行人往來各投
一石積數月而石已纍纍命工築之以次告藏民
稱惠而不費旋檄知仁化乳源縣治益有聲

孔超齡連州人火燒山汛正防把總陞三江協守
備剿捕得力留韶防守咸豐四年紅匪圍城帶隊
保衛深明大義五年二月匪攻南門急超奮勇出
剿冒險力戰中礮傷而歿

客將

附

宋

秦綱建康人性健悍有膽氣飲啗過人其爲詩文
皆悲哀豪慨嘗遊邊多與故將校交語古今成敗

關塞險要歷歷可聽又嘗挾輿地志一冊遊京都
用其策於長安貴人無所遇獨與寶謨閣學士劉
克莊善時莆人方信孺選使完顏議和而克莊薦
綱與信孺偕行三往返後信孺守韶郡赤水洞賊
爲亂信孺募士兵命綱將而討之深入谿崗欲窮
窠穴所將多亡去乃與賊格鬪而死郡侯哀之附
祠於光孝寺

熊飛東莞人以驍勇隸宋文天祥麾下兵敗降元
求領兵取廣州至則黃世雄已據城飛還東莞世
雄遣將姚文虎追襲之爲飛所敗飛復附宋世雄
懼棄廣城走宋制置趙潛安撫方輿據廣州命飛

與夏正炎爲將督軍校劉自立新會宰曾逢龍同
領兵北上十月至大庾嶺遇元將呂師夔戰敗逢
龍死之飛偕劉自立還韶州十一月十四日兵至
圍城飛欲迎戰正炎不從飛夜出兵刦營不得前
正炎登陴中矢死二十一日自立開南門出降元
兵鼓譟入飛猶取民家几案屏障諸物塞諸坊口
督兵力戰以死二帥怒之屠城數刻

明

張開祚不傳籍貫累功至遊擊崇正十一年楚寇
劉新宇等攻韶城總督熊文燦遣開祚援之與賊
大戰於蕭村斬首數百級復輕騎窮追爲賊所害

同歿者守備陳邦基把總王龍鄒維勲哨兵三十

名文燦自爲文以祭

朝廷養士責節義於行間忠

將不忘裏草之心而志士每切全軀之耻亦知鋒
鏑之下死生之關機變須臾勢分呼吸然而戰貴
氣氣欲雄將貴膽膽欲決頃者干戚不戒寇犯韶
城爰發標兵遂清狐鼠初戰俘斬者二百級再戰
死事者三十人惟雄惟決殆實兼之捷以是死亦
以是其捷也功其死也義而或者見捷則稱間死
則議此庸人兒女子之見而非所語於英雄之間
也張將軍開祚義畧軒翔忠腸挺拔兵來寇解手
到勲成卓哉偉丈夫之槩迨夫奮袂突戰中伏捐
軀洒腔血於山原剖忠肝於白日克酬壯志不負
簡書既經題敘則姓字猶香尚待特恩將血食靡
替其亦可以愜志於九泉矣守備陳邦基拔自遠
地畀以前茅瞻大於身技兼乎勇首摧勁敵次突
重圍生前之績死後之忠功已徹於宸旒名豈埋
於野草與把總王龍鄒維勲蹈湯赴火救將捐生
同爲節烈之臣不愧褒揚之典若哨兵三十名恩
聯一體義篤同仇載稽死長之人半是礫賊之輩
百夫之特贖也何從雖然成仁赴義語言燦白骨

之光列俎肆筵卒伍下衣冠之拜歿之榮其猶愈
於生之倖哉念我將士義骨雖函忠魂在野遙據
憑弔親製挽章握管涕橫臨文語咽嗚呼彌原忠
孝不受風雨之憐報國丹誠永照日星之氣以功
在地方俾地方官陳儀
戰壘招魂而奠之尙饗

國朝

宋登喬籍貫無稽駐防曲江順治四年叛兵簡信
等圍城登喬與參將李美等出戰屢勝後以先登
陣亡

陳綸湖南人雲騎尉官南雄都司年弱冠膽氣過
人居官嚴飭行伍咸豐四年十月紅匪復圍韶謀
於州牧選精兵來援旣就道兼程而進抵韶馳驟
殺賊賊設伏於河西綸陷陣無懼色左右冲殺伏